


UNCLE LOUIS STORE



Ken tabata Uncle Louis?



Uncle Louis a construi e edificio na B. van der Veen Zeppenfeldtstraat 7 den un estilo moderno p'asina por engrandece su tan popular tienda 'Uncle Louis Store'. Awor despues di tabata hopi aña bashi e edificio a pasa den un restauracion completo treciendo recuerdonan bek na e generacionnan anterior y pa e generacion mas jong, e pregunta; Ken tabata Uncle Louis?

Leon Waitzberg (Wajcberg) conoci manera Uncle Louis a nace dia 27 di maart 1894 na Polonia y tabata biba na San Nicolas hunto cu su casa Malka Waitzberg. Na aña 1937 e comerciante a cuminsa cu un tienda na B. van der Veen Zeppenfeldtstraat 20, yama 'Uncle Louis Store'.

Na añanan cuarenta Leon a cumpra e edificio di Shangelai Store, net na e otro banda di caminda, y a basha esaki abou. Despues di a adkiri e tereno banda di esaki tambe, a bay over na cuminsa cu e construccion di un edificio nobo pa 'Uncle Louis Store'. Un edificio di dos piso, diseña segun e buki di 'Bouwen op de Wind', probablemente p'e arkiteco Jan Nagel cu un estilo di arkitektura di 'Nieuwe Bouwen'. E construccion di e edificio tabata den man di e contratista Van Dijk. Arubaanse Courant di 1951 ta describi e edificio manera uno moderno y espacioso. Na juli di aña 51 Leon Waitzberg a muda su tienda pa e edificio nobo na e piso abou. Na e promer piso Leon tabata biba cu su casa Malka.

E tienda di Uncle Louis tabata hopi popular y te ainda bon recorda pa su articulonan di moda y telanan importa for di Europa y Sur America. Sigur pa e cosedonan di e tempo aya 'Uncle Louis Store' tabata e tienda pa bishita pa e telanan di mas moderno y bunita.

Durante un entrevista, Linda Waitzberg, sobrina di Leon, ta corda cu su mama tambe sa cumpra tela na 'Uncle Louis Store' y te ainda ta corda e diseño di e tela di algun di su shimisnan. E ta recorda su omo grandi, Uncle Louis, manera un persona fuerte, cu su cabeynan blanco y Aunt Martha (Malka) manera un persona cariñoso.

Informacion ricibi di Linda Waitzberg suyuy alabes nietodie subrino di Leon Waitzberg, Arturo Desimone, ta bisa: "Mi tio grandi, Louis, a biaha promer pa Argentina, caminda cu tabata tin un comunidad grandi di hudi, despues a bay Guajira na Colombia, caminda su ruman Miryam a biba promer cu establece na Aruba. Louis tabata papia Ruso, Polaco, Aleman, Hebreo, Yiddish y Ingles".

Leon tabata ruman di Maria Yrausquin Waitzberg, esposa di Juancho Irausquin, y tambe e prome miembro femenino di eilandsraad di Aruba.

Leon a fayece 18 di maart di aña 1966 na edad di 71 aña y a laga e edificio y negoshi pa su casa Malka. Na aña nobentidos Malka a fayece y a laga e edificio pa su sobrinonan. Leon y Malka no tabata tin yiu.

For di aña 1984 John Nisbeth di Uncle Louis Store a huur e negoshi te cu aña 1998. Den un articulo di Amigo di 18 di juli 2014, John Nisbeth ta conta cu e la cuminsa traha na Uncle Louis Store for di aña 1945 manera bendedor. E ta conta cu e la traha pa cuarenticinco aña largo y a siña hopi for di Leon. Despues cu Leon a fayece, su casa Martha a pidi John pa bira e manager, e la acepta e reto y ta conta cu e tabata sinti su mes manera parti di famia debi na e bon trato cu e la haya serca nan.

Na aña nobentiocho e edificio a wordo bendi cu gobierno di Aruba y a bira oficina di Departamento di Aduana. Na 2010 e edificio a keda apunta manera monumento proteha. Na 2017 Stichting Monumentenfonds Aruba (SMFA) a cumpra e edificio y a duna permiso na Ateliers '89 pa haci uzo di esaki mientras tabata prepara e proyecto pa restauracion.

Na April 2019 a cuminsa cu e restauracion di e edificio cu a termina na februari 2020 y awor lo bira e oficina di Directie Natuur en Milieu.

E edificio akita e prome monumento di Stichting Monumentenfonds Aruba cu ta conta cu panelnan solar, un sistema di reciclahe di awa y un green wall. Banda di esaki SMFA a traha hunto cu Fundacion Arubano di esnan Visualmente Incapacita pa adapta e edificio pa un empleado cu vision limita.

Diferente aspectonan original di e monumento a wordo treci bek, asina por mira por ehempel, e balcon habri atrobe, e tegelsnan bruin pafor, e color original pero tambe e number riba e fachada pa recorda un y tur cu esaki tabata e tienda di UNCLE LOUIS.

Fuente:


O. van der Klooster en M. Bakker, *Bouwen op de Wind Architectuur en Cultuur van Aruba*, Netherlands, 2007.

L. Reijnders, Amigoe, "De eigenaar van Uncle Louis Store was een Poolse Jood", 18 juli 2014.

L. Peterson, *A story of Arturo Desimone about his family Wajcberg*, 20 May 2019.

L. Peterson, *A short story of Linda Wajcberg in relationship to her Uncle Louis and Miss Martha of the Uncle Louis Store*, 9 April 2019.

L. Peterson, *The history of the Uncle Louis Store building*, 2019.



www.monumentenfondsaruba.com